

DOMENIE XXIX «VIE PAL AN»

Antifone di jentrade Sal 16,6.8

Jo ti clami, Diu gno, ma tu rispuindimi.
O soi sigûr che viers di me tu slungjis lis tôs orelis.
Vuardimi, Signôr, come la lûs dal voli,
platimi te ombre des tôs alis.

Colete

Diu onipotent e eterni,
danus une volontât che si plei simpri denant di te
e di servî a la tô maiestât cu la scletece dal nestri cûr.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Is 53,10-11

Se al ufrîs la sô vite tant che un sacrifici di espiazion, al viodarà une dissendence.

Dal libri dal profete Isaie
Al Signôr i à parût ben di fruçâlu cul patî.
se al ufrîs la sô vite tant che un sacrifici di espiazion,
al viodarà une dissendence che e vivarà a lunc,
e midiant di lui si fasarà la volontât dal Signôr.
Par vie dal torment de sô anime al viodarà la lûs,
si passarà de sô cognossince.
Il gno servidôr just al justificarà tancj di lôr,
cjapantsi sù lui lis lôr incuitâts.
Peraule di Diu.

SALM RESPONSORIÂL dal Salm 32

R. Danus la tô grazie, Signôr, nestre sperance.

La perauale dal Signôr e je juste
e fedêl ogni sô vore.
Lui al ten pe onestât e pe dretece;
dal boncûr dal Signôr e je incolme la tiere. **R.**

Ve, il voli dal Signôr si poe sun chei che lu rispjetin,
sun chei che tal so boncûr a sperin,
par sfrancjâ de muart lis lôr vitis,
par tignîju in vite in timp di miserie. **R.**

Viers dal Signôr e brame la nestre anime:
al è lui nestri scût e nestri jutori.
Che al sedi sore di nô, Signôr, il to boncûr,
parcè che dome sun te o stin fidâts. **R.**

SECONDE LETURE Eb 4,14-16

Svicinînsi cun plene fiducie a la sente de grazie.

De letare ai Ebreus
Fradis, stant che o vin un prin predi che al à travanât i cfi, Jesù, Fi di Diu, tignîns salde la nestre fede.
Di fat no vin un prin predi che nol sedi bon di vê dûl des nestris pecjis, sint stât provât ancje lui in

dut come nô, fûr che tal pecjât. Svicinînsi duncje cun plene fiducie a la sente de gracie, par vê la remission, par cjatâ gracie e par jessi judâts tal moment just.
Peraule di Diu.

CJANT AL VANZELI cf. Mc 10,45

R. Aleluia, aleluia.

Jesù Crist al è vignût par servî
e dâ la sô vite in riscat par tancj di lôr.

R. Aleluia.

VANZELI Mc 10,35-45

Il Fi dal om al è vignût par dâ la sô vite in riscat par tancj di lôr.

Dal vanzeli seont Marc

In chê volte, si svicinin a Jesù Jacum e Zuan, fîs di Zebedeu, e i disin: «Mestri, o volîn che tu nus fasis ce che ti domandî». Ur domandà: «Po ce volêso che us fasi?». I rispuinderin: «Danus di sentâsi un a la tô diestre e un a la tô çampe inte tô glorie». Ma Jesù ur disè: «No savêso nancje vualtris ce che o domandais! Rivaiso a bevi il cjaliç che o bêf jo o a jessi batiâts cul batisim che o soi batiât jo?». I rispuinderin: «O rivîn». Ma Jesù ur disè: «Il cjaliç che jo o bêf lu bevarês ancje vualtris e ancje cul batisim che o soi batiât jo o sarês batiâts, ma sentâsi a la mê diestre o a la mê çampe no mi sta a mi di dâusal, ma al è par chei che al è stât preparât par lôr».

Sintint cussì, chei altris dîs a tacarin a invelegnâsi cuintri di Jacum e di Zuan. Ma Jesù, dopo di vêju clamâts dongje di sè, ur disè: «O savêso in ce sisteme che chei che a son ritignûts sorestants dai popui ju tegnin sot di parons e i lôr grancj ju tibiin. Nol à di jessi cussì fra di vualtris; ma se un di vualtris al vûl jessi grant, che al sedi vuestri famei, e chel di vualtris che al vûl jessi il prin, che al sedi famei di ducj. Di fat il Fi dal om nol è vignût par jessi servît ma par servî e par dâ la sô vite in riscat par tancj di lôr».

Peraule dal Signôr.

Su lis ufiertis

Danus, Signôr, ti preîn,
di cirî cun cûr libar i tiei regâi,
par che, purificâts de tô gracie,
o vignîn smondeâts propit cui misteris che ti servîn.
Par Crist nestri Signôr.

Antifone a la comunion Sal 32,18-19

Il voli dal Signôr si poe sun chei che lu rispjetin,
sun chei che tal so boncûr a sperin,
par sfrancjâ de muart lis lôr vitis,
par tignîju in vite in timp di miserie.

O ben: Mc 10,45

Il Fi dal om al è vignût par dâ la sô vite
in riscat par tancj di lôr.

Daspò de comunion

Il contat cu lis robis dal cîl
che nus zovi, Signôr,
par vê i tiei benefizis in cheste vite
e par jessi iluminâts su lis realtâts eternis.
Par Crist nestri Signôr.